



2017-mut Aningaasanut Inatsissatut siunnersuut

(Aningaasaqarnermut Aatsitassanullu Naalakkersuisoq)
(Siullermeerineq)

Amingartooruteqanngitsoq

Uangut apeqqutaavugut, ullumikkut, inatsisiliortutut ataatsimiinnitsinni, qularnaassallugu 2017-mut Aningaasanut Inatsissatut siunnersuutip amingartooruteqarani inerneqaqqinnissaa.
Sooq tamanna pingaaruteqarpa?

Amingartooruteqaraanni tunngaviusumik nuna akiitsortariaqarpoq, soorunami utertinneqartussanik, kinguaariit akileraartartut tullinnguuttut taamaasillutik uangut atuipilunnerput akilissavaat imaluunniit Namminersorlutik Oqartussat aningaasaataannik mianersuaatsumik atuinerput.

Qaqgumulluunniit aningaasanut Inatsimmut tunngavigisinnaanngilarput ukiumi ataatsimi immikkut annertuumik isertitaqarnissaq, assersuutigalugu soorlu aalisarnermi.

Taamaattoqassappat aningaasat illuartittariaqarpagut aningaasaliissutigalugillu aningaasaliissutitut isertitaqaataasussatut, akiitsunut naafferaatitut imaluunniit suliniutinut ingerlatsinermut annertusaataanngitsunut. Tamanna silassorissuliornerusussaavoq.

Paatsoornermik tunngaveqarpoq isumaqarutta maannakkut ingerlalluaratta eqqasuuteqartariaqanngitsugut. Sungiuttariaqarpaluit ukiorpaaluit siumut isigaluta eqqarsartarnissarput, nunamilu aqutsisutut pilersittariaqarpagut inuiaqatigiit atugarissaartut aamma piffissaqartut akissaqarlillu tungiuinermut kinguaariit tullii pilerpata imaluunniit ukiut quilit qaangiuppata.

Aamma tamatuma nassataanik partiitut isumaqatigiinniarnitsinni akisussaassuseqartariaqarpugut immikkoortoq sunaluunniit amerlanerusunik aningaasalerusukkaluarutsigu imaluunniit suliniuteqaqqusigutta aningaasartuutitalinnik.

Demokraatini neriuutigaarput isumaqatigiinniarnerni tulliuttuni amerlanerussuteqarluartut isumaqatigiissuteqarumaartut aamma partiit arlaat - pissutissaqarpiaratik - aningaasanut inatsimmut tamatta isumaqatigiissutigisinnaasatsinnut illersuinertik tunuartissanngikkaat, tikkuartuiniaannarlutik, akisussaassutsimik takutitsinatik.

Iluarsartuussinerit aamma suliniutit

Isertussanngilarput Demokraatini kissaatigigatsigu ingerlatseqatigiiffiit akileraarutaasa appartinnissaat kiisalu sulinermut ilanngaammik eqqusserusukkatta. Sooq?



Aningaasaqarnermut politikki aningaasaliissuteqarnissamut killiliisoq - tassa politikki innuttaasut ikinnerusut pisortanik pilersorneqalernissaannik tunngaveqartoq aamma akitsutinik eqqussinissaq - anguniarlugu pisiat tunisallu oqimaaqatigiinneranni kusanarnerusumik sinneqartoorteqarnissaq aamma inuiaqatigiinni akinik patajaannerulersitsinissaq - kisimiitinneqarsinnaanngillat, aamma ineriertortsisariaqarattta isertitallu amerlisarlugit, aningaasarsiornermut politikki atasinnaasoq anguniarlugu.

Taamaattumik aningaasaqarnermut politikki aningaasaliissuteqarnissamut killiliisoq aningaasaqarnermut politikkimik annertusaasumik ingiaqateqartittariaqarparput.

Aningaasaqarnermut politikki annertusaasoq tassaavoq akileraarutinik akitsutinillu annikillisaaneq, atuineq uummarissarniarlugu imaluunniit aningaasaliinissaq piffissaq qaninnerusoq isigalugu Landkarsimut isertitsissutaalersussaq.

Aningaasanut Inatsit sunaluunniit immikkut misikkarissisarpoq piffissaq qanoriliguaraangalluunniit partiit immikkoortut immikkullarissut sallutinnialeraangatigit qinersisitik pissutigalugit.

Kisianni Inatsisartuni ilaasortatut aamma immikkut inuiaqatigiit akisussaassusilimmik ingerlanissaannut akisussaaffeqarnerput pissutigalugu - aamma ukiut qulit qaangiuppata - allatut ajornartumik tusarnaartariaqarparput nunatsinni suut ajornartorsiutaanersut.

Aamma unneqqarittariaqarpugut; maannakkutut ingerlassalluta akissaqanngilagut aamma immikkoortut ilaat tunulliuttariaqarpagut allat aningaasaliiffigisinnaajumallugit imaluunniit nukinnik amerlanerusunik tuniniarlugit. Aamma allatut ajornartumik suliniutit pingaarnersiortariaqarpagut taamatullu angusassamik toraagaqarluta ineriertorneq uummarissartariaqarparput, ikiuisariaqarpagut imminut ikiulernissaq pillugu aamma suliniutigut pingaarutilinnut eqikkattariaqarpagut taamatullu nukigut pilersikkumallugit inuiaqatigiit inatsisitigut isumannaatsut naapertuilluartuunermillu tunaartallit, avissaartuunneq pinnagu, suliniut ataqqinaatissat pinnagit aamma najukkamik ingasaallugu illersuineq pinnagu.

Innuttaasut, peqatigiiffiit, inuutissarsiorttullu oqaloqatigilluarnerisigut kiisalu eqqaamallugit Akileraartarnermut tungiuinermullu isumalioqatigiisitap innersuussutigisimasai avaqqutassaanngitsunik kissaateqarpoq uangut politikerit malittariaqakkatsinnik.

Meeqqat atuarfiat, inunnik isumaginninneq, ilinniarfissuup pitsanngorsarnissa, aallarnisaasartut atugaasa pitsanngorsarnissaat, nunanik allanik niueqarteqarnermi aporfii, aalisarnermi atukkat, inuusuttut atugaat siunissartik qularnaarumallugu aamma allarpassuit nunami maani ullutsinni sunniutilerujussuupput.

Iluarsartuussinerit pisariaqarput, tamanna assortugassaagunannilaq aamma Demokraatit isumaat naapertorlugu ingerlatseqatigiiffiit akileraarutaat appartariaqarpoq siunertaralugu suliffinnik amerlanerusunik pilersitsisinnaanngornissaq.



Sullivimmik aallartitsinissaq. sulineq sulliviillu pilerinarsarusuppagut, sualummik qeqertami ungaseqisumi najugaqarallartilluta - taamaattumik inuppaalunniq atorfinititsinissaq akissarsiaqartitsinissarlu akissaqarttariaqarparput, inuitissarsiutini alliartortussani, soorlu; takornariaqarnerup iluani, kulturimik avammut niueruteqarnermi, nilaat imerlu kalaallit nunaanneersut, nioqquqissanik kusanartunik tunisassiornerup iluani aamma ingerlatani minnerni tamarmik arlaatigut nunani allaniik aningaasanik isaatsilersussani.

Ingerlatseqatigiiffiit akileraarutaannik appaaneq aamma ingerlatseqatigiiffinnut nunatsinni akileraarutit qaffasippallaarnerat pissutigalugu ingerlatamik ilaannik nunani allaniititaqartut ajornartorsiutaannut oqilisaasinnaavoq.

Aningaasarsiorneq ilorraap tungaanut saatinneqarsinnaavoq ingerlatseqatigiiffiit akileraarutaannik appaaneq suliniutinik allanik ilasuungutsigu; sullivinnik aallartitsineq pisariittoq pisalersillugu, akileraariaaseq pisariunngitsoq ingerlatiinnarutsigu, minnerunngitsumik kommunini sullissineq sukkanerulersikkutsigu pitsaunerulersillugulu aamma allaffissornikillisaagutta sulliviutillit ikiorniarlugit apeqqutaatinnagu aalisartitseqatigiiffissuaq pineqarnersoq imaluunniit kusanartunik atisaarniarfinnguaq.

Aamma piginnaanngorsaanerit iluaqtissarsivigniartariaqarpagut, pikkorissarnerit sivikitsut atorlugit suliffissaaleqisut ilinniartittarlugit sullivinni minnerni sulisinnaanngorlugit aamma takornariartitsinerup iluani, takornariat amerlisarniarlugit suliniutitsinnut atatillugu assersuutigalugu Island soleqatigalugu.

Iluarsartuussinerit uangutsinnut isumaqartut ilaat tassaavoq sulinermut ilanngaammik eqqussineq.

Manna periarfissaq iluatsillugu oqaatigissavarput aamma kissaatigigatsigu inuiaqatigiinni akileraarutit pingaannginnerusut misissornissaat takuniarlugu sulinerunissamut akorngutaanersut, qanngiuttoornermut imaluunniit immikkut sammisaqartitsiniarnermut akorngutaanersut anguniarlugu sulinermi akissarsiarissaarnerulernissamut aporfiiit piiarnissaat pisortanit pilersorneqarneq millisarniarlugu.

Akiitsut ineriartornerat

Demokraatini isumaqarpugut mianersuutigisariaqaripput nutaanik akiitsunik pilersitsinnginnissarput, imatut paasillugu ukiuni qulikkaani siuliini akiitsungaatsiarnikuuvugut ulloq manna tikillugu suli ilungersuutigisatsinnik. Immikkut qinnutigissuarput nuna akiitsortissannginnatsigu isertitaqarnerulersinngitsunik.

Timmisartunut suluussalinnut mittarfiit, takornariat imaatigullu angallanneq oqallisigingaagatsigu eqqarsaatigilluaqqissaartariaqarparput inuiaqatigiit sukkut qanorlu iluaquserneqarsinnaanersut piviusumik atasinnaasutsimut uuttuinermut naleqqiullugu. Allatut oqaatigalugu pilersitsissanngilagut attaveqaatinik innuttaasut aningaasarsiornerannut



artukkiisumik - soorlu mittarfinnut akitsuutinik toqqaannartumik annertuserujussuartitsinikkut - imaluunniit toqqaannanngikkaluamik akileraarutit akitsuutillu qaffannerisigut.

Taamaattumik nuannaarutigilliunnarpalput Kalaallit Airport A/S pilersinneqarmat aamma kaammattutigissuarput suliat eqqarsaatigalugit paasiuminartuunissaat - aamma innuttaasunik paasissutissanik avitseqatigiittarnissaq eqqarsaatigalugu, sukkasuumik imminut akilersinnaassuseq, akulikissutsit, akitsuinerit akikilliliinerillu paasipallattarniassamatigit aamma takornariat amerlisarnissaanut piumasaqaatit mittarfiit imminut akilersinnaanissaat pillugu. Oqaatsit tamatta paasisinnaasagut atorlugit aamma ersarissunik innersuussinertalerlugit naatsorsueriaatsinut aamma paasissutissanik pissarsiffinnut. Paasiuminartumik pinissaq tamatumunnga atatilulgu pingaaruteqarluinnarpoq.

Eqqartortariaqarparput aningaasaqarnermut politikkikkitsinnut tunngatillugu atasinnaassutsimut tikkuteqartariaqaratta, piviusumik tunngaveqarluni naatsorsukkamik.

Atasinnaassutsimut tikkuttip takutittassavaa BNP-p inernera piviussoq, uangutsinnut tunngatillugu BNP-mut assersunneqarsinnaasoq kisitsit - tassa suut tamaasa naatsorsuutigalugit nunap pilersitai - pigineqartussaq pilersinniarlugu aningaasarsiornerup attatiinnarnissaa.

Kisitsisip tamatuma takutissavaa sutigut aningaasarsiornikkut atasinnaanngitsoqarnersoq.

Kisitsimmi eqqarsaatigineqartariaqassaaq namminersorlutik oqartussat pigisaat sulliviit kiisalu ilaannakoortumik pigisaasa sulliviit akiitsui kiisalu kommunit Namminersorlutillu Oqartussat tamakkiisumik akiitsui. Tassa imaappoq allatut ajornartumik aamma ilaatigut ineqarnermi kinguaattoorutit annertoorsuit ilannguttariaqassavagut kisiannili aamma inunnik isumaginninnerup iluani.

Piffissaq ungasinnerusoq isigalugu aaqqiissutissat uninngatiinnaraanni qanoq akeqassava?

Allatut ajornartumik massakkorpiaq iluareqquaarluni neriorsuisarnerit qimattariaqarpagut qularnaarlugulu atasinnaasumik pitsaasumillu inunnik isumaginninnermi politikkissaq kommunit soleqatigalugit aamma kinguaariit tullit arlallit eqqarsaatigisariaqarpagut.

Qanoq iliorluta nunami maani attaveqaatit, umiarsualiviit, inissiat, atuarfiit kollegiallu eqqarsaatigalugit iluarsaassineri kinguaattoorutitigut ajornartorsiuterujussuit iliuuseqarfissavagut aammali peqataanik inunnik isumaginninnerup iluani eqqarsaatigalugit siunissami sulinermi iluanaarutissatigut annaasassat, inuttut atukkatigut kingornuttakkat ingerlaqqittartut aamma pinerluttarnerit kiisalu naapertuilluartumik misiginninneq inquiaqatigiinni?

Suut annaasarpagut inuusuttumik imminut toquttoqarneri tamaasa? Aningaasatigut aammali inuttut annaasat eqqarsaatigalugit?

Suut annaasarpagut meeqqanik inuusuttunillu kinguaassiutigut atornerlunneqarsimaneri tamaasa?



Aningaaasarpassuit milliuunilikkaat sulinermi iluanaarutissaraluit annaasarpagut, napparsimanersiutit paasinartut, inissiinernut katsorsaanernullu aningaaasartuuterpassuit amerliartortut - maannakkut siunissamilu.

Kisianni inuiaqatigiinnut qanoq akeqarpa ullutsinni inuit taama amerlatigisut naalliunnerat, kanngutsaattuliorfigineqarsimaneerat allaat kinguneqarsimalluni asasaminnik inooqateqarsinnaanerat, sulisinnaanerat, ilaqtuttaminik inooqateqarsinnaanerat ataqqatalersimalluni imaluunniit atasinnaajunnaarsimalluni? Inuttut anniaat taama annertutigisoq qanoq ililluta uuttorsinnaavarput? Inooqataaffigisinnaavarput meerartatta inuuusuttattalu angerlarsimaffimminni persuttarneqartartut, erngunnermik, ikiaroornartumik atornerluinermit, kinguaassiutitigut atornerlunneqartarnermit kaannermillu misigitinneqartartut ikiorsinnaannginneri - ullutsinni? Aamma suli kinguaariinnik nammineersinnaanngitsunik amerlanernik pilersitsiortuassaagut, pisortat piffissaagallartillugu ikiuisinnaasimannginnerat pissutigalug? Aamma qanoq iliorluta qularnaassavarput ullumikkut ikiorsernissaat? Kalaallit Nunaanni qanoruna pisoqartoq? Qanoq iliorluta immitsinnut ikiorsinnaavugut aamma innuttaasut, inooriaaserput inuiaqatigiinni iluaqtaalersillugu, naalliunneq millisillugu, ulorianartorsiortut pitsaanerusumik aaqqiivisiginnaanngorlugit, eqqartuussiviit, politiit, naalliuuttortagut?

Soqutiginngilara maani akerartuunnissarput. Piffissanngorporli aningaaasanut inatsisisap isumaqatigiinniutignerani inuppalaarnerup - aamma misigissutsit ilaatinneqartalernissaat. Akissaqartinngilarput innuttaasut taamatut naalliuuttuarnerat. Naamerluinnaq.

Atasinnaassutsimut tikkuitit, aningaaasarsiornermut politikki aamma inuit aningaaasatigut atugaat eqqarsaatigalugit Demokraatini isumaqarpugut nassaarissallugit pingaarutilerujussuusut, ukiumiit ukiumut, taamaattumik paassisutissanik peqarluarluta oqallisigisariaqarpagut taamaattumik matumuuna kaammattuut Naalakkersuisoqarfinnut minnerunngitsumillu Aningaasaqarnermut Naalakkersuisoqarfimmut ingerlateqqissavara.

Aamma aningaaasaliisartunut takutissagatsigu Kalaallit Nunaat nunatut aningaaasaliiffigissallugu erumananngitsoq, piffissaq ungasinnerusoq isigalugu, apeqqutaatilluguli politikki qanoq ittoq ingerlanneqarnersoq aammali qularnaarumallugu politikkikkut partiit suut mianerissariaqarneraat isumaqatigiinniarneri.

Meeqqat atuarfiat aamma ilinniartitaaneq

Politikkikkut Aningaaasarsiornikkullu Nalunaarummi samminqeartut iluarsartuussinermut aqqutissat sisamaasut ilaaqtaaseq tassaavoq ilinniartitaaneq.

Meeqqat atuarfiat ilungersunartorsiorfiuvoq. Ima ilungersunartorsiorfiutigaluni meeqqat atuarfiini atuartut affaat atuarfik qimattarlugu allamik ilinniagaqarsinnaanatik taamaallaat meeqqat atuarfiani atuarsimanerminnik.

Sooq ajornartorsiutaava? Ajornartorsiutaavoq pissutigalugu tagginneqarnikuummat 2030-mi 7.500-nik soraarnernik nuna manna inoqalerumaartoq. Peqataanik sulisinnaasunik taggiineq



naapertorlugu 2030-mi sulisinnaasut 37.000-t (18-niik 64-nut ukiullit) 2030-mi ikileriarsimasussaapput 35.000-t missaannut. Kisitsisini taakkunani ilaatinneqanngillat ullumikkut nunatsinnut nuussimasut qimagussimasullu assigiinngissutaat aamma ilaatinneqanngilaq sulisinnaasut akormanni inuit qasserpiaat suliffeqarnersut. Tassa imappaq kisitsit isumalluarnartut kisimik pineqarput.

Aningaasarsiorneq eqqartortillugu pitsasumik inerneqartitsisoqarsinnaanngilaq, innuttaasut peqqissusaat ilaatinngikkaanni, innuttaasut imminnut peqqinnartumik inuutissinnaanerat ilaatinngikkaanni aamma qitornaasa aamma inuunermut tassunga ilaammat: meeqqat ilinniartitaanissaat.

Ilinniartitsinngikkutta nunami maani atukkat pitsangortinneqarsinnaanngillat tamatumalu kingunerissavaa soraarnerit, meeqqat inuuusuttullu ajornartorsiutillit napparsimasut sanngiitsullu atungarliornerulernissaat, siunissami tungiuineq akissaqartinneqanngimmat.

Taamaattumik pingaartorujussuuvoq piaartumik meeqqat atuarfiani pitsaatsutsimik annertusaanissarput ajornanngippat sukkannerpaamik aamma nassuerutigalugu meeqqat atuarfiata pisariaqartikka sukcasumik paasiniaasoqarnissaa kiisalu ukiualunnguit ingerlanerini suliniutinik sukcasumik eqquassinissaq qularnaarlugu meeqqat pitsasumik tunngaviusumik kalaallisut, danskisut, tuluttut, matematikkimi atuartitaasalernissaat aamma fagini tunngaviusuni ima qaffasissuseqalersillugit allaat ilinniagassatut pissanganartitaminnik tulluarisaminnillu periarfissaat ingerlaannaq piviusunngorsinnaanngorlugit. Siunissami kinguaariit sakkunik taamaattunik peqalersimasariaqarput.

Iluaqutaanngilaq uangut politikerit immikkoortumi immikkut ilisimasalittut inissinnissarput. Demokraatini kissaatigaarput immikkut ilisimasalinnik ilinniarluarsimasunik inuttalimmik suligasuartussamik suleqatigiisitaliornissaq meeqqat atuarfiisa ilaannut pulaartussanik, atuartitsinermik nalilersuisussamik, inunnik isumaginninnermi ajornartorsiutinik nalilersuisussamik, pissusissanik malinninniarnermi ajornartorsiutinik nalilersuisussamik, unamminartunut sinaakkutissat aamma tamakku aallaavigalugit piffissaq qaninnerusoq ungasinnerusorlu isigalugit aaqqiissutissanik innersuussuteqartussamik. Meeqqat atuarfiat immikkoortuuvoq sapangitassarinngisarput. Ilinniartitaaneq inuit inuttut aningaasarsiornikkullu atugaasa qularnaarnissaannut sakkuni sivikinnersaavoq atorsinnaasarput, qularnaarniarlugu ikiuineq imminut ikiulernissaq pillugu, kinguaariinnik atugarissaarnerulersinissaq aamma ilinniarnerup nammineq inuit inuttut akissarsiatigullu kingornuteqattaartagaannit aninguinissaannut ikiortarpai.

Ullumikkut suliassaraarput qularnaassallugu nunami maani innuttaasuni kinguaariit tulliisa ineriartornermut isiginnaartuuinnannnginnissaat atorfinni ajornikuni atorfefeqarlutik aamma ilinniartitaanerup qasukkarneqarnera pissutaalluni allamiunik nunarsuup sinnerani



unammilleqataasinnaannginnejnq piginnaasat, ullut napparsimasarnerit, nuannaaneq, ilaqtariittut inuuneq aamma tarnikkut peqqissuseq eqqarsaatigalugit.

Demokraatini kissaatigaarput piffissaq sivikinnerusoq isigalugu ilinniartitaanermut ilanggullugu piginnaasaviiit annerusumik paasiniarneqartalissasut aamma anguniassagipput ilinniartitaanerni tamani pitsaassutsip qaffasinnerulernissaa - apeqqutaalluni meeqqat atuarfiat pitsaanerusoq pilersinneqassanersoq.

Qilanaaraarput Aningaasanut Inatsisissamut siunnersuutip kusanartumik oqallisiginissaanut aamma partiit tamaasa kissaappagut isumaqatigiinniarluarnissaannik.

Taamatut oqaaseqarluta Aningaasanut Inatsisissamut siunnersuut Aningaasaqarnermut Akileraartarnermullu Ataatsimiititaliamut innersuupparparput.